



KEMENTERIAN PERDAGANGAN DALAM NEGERI
DAN KOS SARA HIDUP

KERATAN AKHBAR DAN MEDIA ONLINE UNTUK MAKLUMAN :

Y.B. MENTERI

Y.B. TIMBALAN MENTERI

Y.BHG. KSU

Y.BHG. TKSU (PDN)

Y.BHG. TKSU (PPP)

SETIAUSAHA AKHBAR

24 JANUARI 2023 (SELASA)



KEMENTERIAN PERDAGANGAN DALAM NEGERI
DAN KOS SARA HIDUP

KERATAN AKHBAR DAN MEDIA ONLINE (KPDN)

24 JANUARI 2023 (SELASA)

Harga minyak turun jika isu tenaga kerja selesai

Kementerian, pemain industri adakan perbincangan tangani isu di pasaran

Oleh Suraya Ali
suraya.ali@bh.com.my

Kuala Lumpur: Pengeluar minyak masak utama negara sedia menimbang menurunkan harga minyak masak jika isu kekurangan tenaga kerja asing yang dialami industri itu ketika ini dapat diselesaikan kerajaan.

Menteri Perdagangan Dalam Negeri dan Hal Ehwal Pengguna, Datuk Seri Salahuddin Ayub, berkata perkara itu dimaklumkan kepadanya dalam pertemuan beliau dengan pemilik ladang sawit dan pengeluar minyak masak utama negara, antaranya FELDA, FGV Holdings Berhad dan Sime Darby Berhad.

"Dalam perbincangan, saya minta harga minyak masak berasaskan sawit diturunkan kerana jualan di pasaran tempatan hanya membabitkan peratusan kecil. Melihat pengeluaran sawit negara, hanya 6 peratus adalah untuk kegunaan dalam negara, selebihnya untuk pasaran luar.

"Sebagai balasan, pemain industri mencadangkan supaya mereka diberikan tenaga buruh asing secukupnya (sektor perladangan dan perkilangan) untuk mereka memikirkan mengenai perkara itu, sama ada harga minyak masak boleh diturunkan," katanya dalam temu bual eksklusif bersama BH.

Salahuddin berkata, perbincangan berkaitan perkara itu dengan penggiat industri berkenaan yang dimulakan sejak beliau dilantik mengetuai Kementerian Perdagangan Dalam Negeri dan Kos Sara Hidup (KPDN) pada awal bulan lalu, masih berjalan.

"Antara kumpulan yang sudah berjumpa dengan KPDN adalah FELDA, FGV, Sime Darby dan beberapa pengeluar lain. Kabinet sudah membuat keputusan agar masalah ini dapat diselesa-

kan dalam tempoh tiga bulan.

"Dalam tempoh tiga bulan pertama (pembentukan Kabinet), kami mesti selesaikan isu keperluan tenaga buruh meliputi sektor pembuatan, pembinaan, pertanian, perladangan dan penternakan dengan harapan ia boleh menyumbang kepada penurunan atau menstabilkan kembali harga barang keperluan di pasaran," katanya.

Mengenai penetapan harga minyak masak kepada dua kategori, iaitu bersubsidi dan harga untuk peniaga, Salahuddin berkata, ia dipecahkan demikian bagi mengurangkan beban kos sara hidup rakyat yang memerlukan.

Mengikut statistik yang diperoleh, katanya, sebanyak 20 peratus rakyat Malaysia yang dahulunya berada dalam kategori golongan berpendapatan 40 peratus sederhana (M4) kini sudah tersenarai dalam kelompok berpendapatan 40 peratus terendah (B40) akibat pelbagai faktor.

"Mereka yang dulunya M40 kini mula berniaga kecil-kecilan, ada juga menjaja makanan seperti pisang goreng, burger dan sebagainya yang banyak bergantung kepada minyak masak bagi menampung keperluan keluarga," katanya.

Salahuddin memberi jaminan kementerianya komited mengawal kestabilan harga barang keperluan dengan memastikan tiada pihak mengambil kesempatan menaikkan harga, walaupun ada pemberian subsidi oleh kerajaan.

"Daripada 41,000 barangan dalam pasaran di negara kita, hanya 41 jenis barangan dikawal harganya oleh kerajaan untuk kepentingan rakyat, kami (KPDN) kawal walau situasinya sukar sekalipun.

"Kami kawal melalui perundingan dengan pemain industri. Itu kaedah dan cara kerajaan menjaga kepentingan rakyat, selain usaha meningkatkan pendapatan rakyat menerusi Inisiatif Payung Rahmah," katanya.

Payung Rahmah diperkenalkan kerajaan bagi membantu golongan B40 mendepani isu kos sara hidup yang dijangka lebih serius tahun ini. Ia inisiatif langkah jangka pendek bagi mengurangkan beban sara hidup golongan itu dalam tempoh enam bulan ini, dijangka dilaksana-



Salahuddin pada temu bual eksklusif bersama BH di Kementerian Perdagangan Dalam Negeri dan Kos Sara Hidup, Putrajaya. (Foto Aizuddin Saad/BH)

kan dalam tempoh 100 hari.

Tahap kesedaran pengguna

Dalam perkembangan berkaitan, Salahuddin berkata, tahap kesedaran pengguna mengenai hak dan kuasa mereka di negara ini masih rendah berbanding negara maju lain dan KPDN akan terus meningkatkan kesedaran rakyat mengenai perkara itu.

"Saya tidak keberatan untuk menyatakan negara kita masih memerlukan menteri-menteri untuk bekerja lebih kuat kerana tahap kesedaran pengguna terhadap hak dan kuasa mereka belum lagi seperti negara-negara maju lain sehingga boleh menentukan harga dipasaran," katanya.

Berharap pengguna akan mula sedar kuasa dan hak mereka dalam menentukan atau menetapkan harga barangan, beliau memberi contoh, menggunakan hak dan kuasa pengguna tidak bermaksud memaksa rakyat mengurangkan pengambilan barangan seperti makanan tetapi lebih kepada menyusun strategi.

"Di Kelantan contohnya, ada peniaga ayam segar mengajak rakyat menggunakan hak dan kuasa mereka sehingga harga ayam di kawasan itu turun jauh lebih murah berbanding kawasan lain ketika krisis harga dan bekalan ayam tahun lalu.

"Harga dan bekalan sebenarnya boleh dikawal jika rakyat memperkukuhkan kesedaran mengenai hak pengguna, bersatu hati dalam bertindak sehingga matlamat itu tercapai. Isunya adalah menteri, kementerian mesti kerja keras mendidik dan memandu pengguna untuk tahu hak mereka," katanya.

Memberi contoh insiden harga hidangan ikan segar mencecah ribuan ringgit di sebuah pulau pelancongan sebelum ini, beliau percaya ramai rakyat berdepan situasi sama, tetapi tidak berbuat apa-apa kerana mereka mampu



KPDN komited mengawal kestabilan harga barang keperluan dengan memastikan tiada pihak mengambil kesempatan menaikkan harga. (Foto hiasan)

dari segi kewangan dan menganggapnya perkara biasa di tempat pelancongan.

"Mungkin mereka ini M40 atau T20 yang mampu, jadi mereka tidak melaporkannya. Kita mesti mewujudkan komuniti pengguna yang benar-benar faham hak, tak kira tahap kemampuan kewangan mereka," katanya.

Katanya, walaupun di tempat tumpuan pelancongan atau tempat peranginan, undang-undang kawalan harga dan peraturan berkaitan harga barangan dan makanan masih terpakai dan tidak berbeza dengan lokasi lain.

"Saya berharap pertubuhan bukan kerajaan (NGO) pengguna akan turut membantu kementerian untuk menyedarkan masyarakat mengenai hak mereka sehingga suatu hari nanti, akan ada satu keadaan positif di mana pengguna boleh jadi kuasa menentukan industri meletakkan harga yang munasabah.

"Jika industri, peniaga enggan patuh suara pengguna, pengguna sendiri boleh bertindak untuk tidak membeli barangan itu atau mengelak ke kawasan tumpuan atau pelancongan terabit sehingga peniaga meletakkan harga yang munasabah untuk pengguna."

"Saya harap itu boleh berlaku jika kita meneruskan misi berte-rusan, beri komitmen, tidak putus asa dan tidak mudah kecewa untuk menunaikan tanggungjawab mendidik pengguna di samping mengawal harga supaya munasabah untuk kepentingan pengguna," katanya.

Untuk tujuan itu, Salahuddin berkata, KPDN mempunyai 2,200 penguat kuasa dan pihaknya sentiasa terbuka untuk menerima teguran dan aduan daripada rakyat mengenai kaedah menambah baik dasar, maklumat berkaitan salah guna kuasa dan harga tidak munasabah selain penipuan.

KPDN fokus subsidi bersasar

Kementerian Perdagangan Dalam Negeri dan Sara Hidup (KPDN) memikul tanggungjawab besar bagi memastikan segala keluhan rakyat berhubung kos sara hidup ditangani sebaiknya. Tatkala pasaran bergelut dengan bekalan barangan keperluan yang terhad,

DATUK SERI SALAHUDDIN AYUB dipertanggungjawabkan untuk mengemudi Kementerian tersebut. Ikuti wawancara wartawan **Sinar Harian**, **TUAN BUQHAIHAH TUAN MUHAMAD** dan jurugambar, **ROS LI TALIB** bersama Salahuddin di pejabatnya di Putrajaya baru-baru ini.

SINAR HARIAN: Apa perkembangan cadangan pelaksanaan subsidi bersasar?

SALAHUDDIN: Kalau ikut perangkaan sekarang, kerajaan menanggung subsidi mencecah RM100 bilion yang diberikan kepada rakyat. Justeru, kerajaan sedang memikirkan dengan teliti untuk melaksanakan subsidi bersasar.

Kalau ikut keputusan kabinet dan Mesyuarat Khas Majlis Tindakan Sara Hidup Negara (NACCOL), beberapa siri perbincangan telah diadakan untuk memperhalusi dengan cermat mengenai pelaksanaannya.

Ia meliputi keperluan asas rakyat seperti petrol, gas petroleum cecair (LPG), minyak masak dan juga ayam serta telur yang sekarang ini masih diberikan kepada rakyat.

NACCOL telah buat pelbagai pendekatan termasuklah mengumpul data secara komprehensif dengan mengambil data daripada jabatan dan agensi berkaitan. Kesemua data ini akan disusun agar Kementerian mendapat angka sebenarnya.

Dari segi pelaksanaan, ia terpujang kepada kerajaan bilakah masa yang sesuai. Kita tidak mahu berlaku kejutan, salah sangka dan panik berlaku dalam kalangan masyarakat apabila subsidi bersasar ini dilaksanakan kelak.

Kerajaan mungkin mengambil pendekatan *soft landing* iaitu bermula dengan satu barangan dahulu, barulah pergi kepada yang lebih bersasar. Contohnya, minyak diesel dan sebagainya. Jadi, kita serahkan kepada kabinet untuk bincang kembali tetapi peranan NACCOL khususnya KPDN yang menjadi sekretariat kepada NACCOL, bertanggungjawab untuk menyediakan semua perkara yang diperlukan bagi memudahkan pengguna.

Segala data yang ada di bawah Kementerian sendiri telah tersedia untuk dibekalkan kepada kerajaan.

Bagaimana pula dengan sistem harga dua peringkat dan kupon pembelian minyak masak pekiet bersubsidi?

Sesi libat urus masih berlaku antara Kementerian dengan pemain industri. Saya telah berjumpa dengan mereka seawal minggu kedua selepas masuk pejabat antaranya Felda, FGV, Sime Darby dan sebagainya.

Dalam sesi libat urus itu, saya minta

kalau boleh harga minyak sawit diturunkan kerana ia melibatkan sekitar enam peratus penggunaan tempatan sahaja dan selebihnya boleh dieksport. Mereka mengaut keuntungan yang begitu besar. Sebagai pulangan, pemain industri mencadangkan supaya mereka diberi secukupnya tenaga buruh asing.

Dalam keputusan kabinet baru-baru ini turut memberi penekanan menyegerakan isu buruh asing, Perdana Menteri, Datuk Seri Anwar Ibrahim beri tempoh tiga bulan agar keperluan tenaga buruh yang meliputi sektor pembuatan, pembinaan, peladangan dan pertanian diselesaikan.

Isu ini mesti diselesaikan dahulu dengan harapan kecukupan tenaga buruh akan menyumbang ke arah menstabilkan kembali harga barangan keperluan dalam negara.

Apabila ada pengumuman subsidi, harga barangan akan naik. Itu kebiasaan yang akan berlaku. Apa perancangan agar ia tidak berulang?

Dari segi ekonomi, sebenarnya tugas KPDN untuk mengawal kestabilan. Semua orang tahu, lebih kurang 41,000 barangan yang terdapat di pasaran ini dikawal kerajaan demi kepentingan rakyat.

Kementerian akan mengawal (harga) dengan mengadakan rundingan bersama pemain industri demi kepentingan rakyat.

Selebihnya usaha kerajaan untuk meningkatkan pendapatan rakyat sekali gus meningkatkan pendapatan isi rumah. Ini peranan besar yang kita raih dalam Kerajaan Perpaduan. Imej Perdana Menteri akan merencanakan lagi perniagaan domestik dan menarik pelabur asing ke dalam negara. Tetapi tugas KPDN untuk sentiasa mengawal harga dan kecukupan di pasaran.

Apa kaedah Kementerian dalam menangani kenaikan harga selepas barangan keperluan seperti minyak dan telur kembali stabil?

Fenomena ini berlaku dalam semua industri di mana mereka tidak mahu menurunkan harga selepas bekalan stabil. Tetapi ini ada kaitan dengan isu melibatkan subsidi yang membuka ruang berlakunya ketirisan dan juga salah guna kuasa atau salah guna barangan subsidi.

Dalam menjawab perkara itu, saya merasakan mungkin lebih banyak libat urus perlu dilakukan dengan pemain industri.

Antaranya saya berjumpa dengan Kumpulan YTL kerana harga simen menjadi isu yang orang ramai marah.

Dengan beberapa siri perjumpaan ini saya harap mereka dapat mengawal harga. Saya suka katakan sesi libat urus menjadi positif apabila ia kerap diadakan terutamanya dengan pihak pasar raya besar. Atas libat urus bersama kita, mereka boleh membuat jualan murah B40 untuk suatu tempoh.

Contohnya, Econsave kita bagi tempoh empat bulan. Ada 1,000 item yang boleh diturunkan harga dari tiga hingga 30 peratus. Ia melibatkan lampin pakai buang kanak-kanak diturunkan sehingga hampir RM10, susu formula dan sebagainya.

Saya yakin lebih kerap kita libat urus dengan pemain industri, rakyat dapat menikmati harga lebih baik.

Bagaimana dengan kenaikan harga makanan seperti kedai makan dan penjaja sedangkan harga barangan telah pun kembali stabil?

Setakat ini bekalan cukup tetapi jangan ada penyeludupan ke sempadan. Perkara itu tidak boleh dikompromi. Sekarang tiada tangkapan besar.

Sememangnya terdapat aduan me-

ngenai kenaikan harga di kedai makan. Ada juga aduan seperti restoran atau kedai makan biasa didapati menggunakan 17 pek minyak masak subsidi setiap hari. Bayangkan jika tukang masak sedang goreng mi, kita rampas. Saya rasa itu tidak bagus.

Bagaimana Datuk Seri mengawal tanggapan terhadap dakwaan KPDN memilih kasih dalam tindakan?

Tidak. Kita lihat lebih kepada kemanusiaan dengan pemain industri yang besar. Kita adakan juga libat urus tetapi kalau mereka melakukan kesalahan yang besar itu tidak boleh kompromi.

Adakah cadangan untuk mewujudkan satu kuota khusus minyak masak subsidi kepada peniaga?

Kita sedang mengkaji bagaimana boleh kita salurkan subsidi kepada peniaga-peniaga kecil yang mengendali restoran dan kedai makan. Ada pandangan bahawa perlu satu label khusus untuk peniaga kecil.

Mungkin kita boleh jual harga RM3 hingga RM3.50 bagi satu kilogram minyak subsidi. Ia masih murah tetapi kajian mengenai perkara ini masih belum selesai.



Tuan Buqhairah (kanan) sedang mewawancara Salahuddin di pejabat beliau pada Isnin.

Tak perlu 'pulau', berunding elok-elok

Kerajaan dan pihak industri disaran bekerjasama tangani isu harga makanan

Oleh **MOHD FAIZUL HAIKA MAT KHAZI**
SHAH ALAM

Kerajaan perlu kembali semula ke meja rundingan bersama semua pihak berkepentingan bagi mencari jalan terbaik menyelesaikan segera isu kekurangan bekalan bahan makanan dan kenaikan harga barangan keperluan asas yang melanda negara ketika ini.

Bekas Menteri Perdagangan Dalam Negeri, Koperasi dan Kepenggunaan (KPDNKK), Datuk Seri Hasan Malek berkata, kerajaan pimpinan Perdana Menteri, Datuk Seri Anwar Ibrahim tidak boleh bertindak bersendirian jika mahu menangani dua perkara berkenaan.

Disebabkan itu kata mantan Ahli Parlimen Kuala Pilah, kerajaan perlu melakukan rundingan bersama wakil persatuan pengguna, pengeluar, pembekal, pemborong, pengimport dan peniaga.

"Kerajaan terutamanya, Kementerian Perdagangan Dalam Negeri dan Kos Sara Hidup serta Kementerian Pertanian dan Keterjaminan Makanan, perlu segera meng-

adakan rundingan dengan pelbagai pihak berkepentingan untuk mencari jalan penyelesaian terbaik bagi mengatasi masalah ini.

"Apabila sudah ada satu keputusan, maka, Kementerian berkenaan mestilah serius dan tegas dalam menguatkuasakan undang-undang termasuk mengeluarkan kompaun atau denda.

"Kita tidak boleh lagi berkompromi kerana sudah ada keputusan bersama dicapai antara kerajaan, pengeluar, pengimport, pembekal, pemborong dan peniaga," katanya kepada *Sinar Premium* pada Isnin.

Menteri Ekonomi, Rafizi Ramli pada Sabtu, menegur sikap sesetengah peniaga restoran dan kedai makan yang masih enggan menurunkan harga makanan dan minuman mereka, meskipun harga bahan mentah di pasaran telah turun.

Mengulas lanjut, Hasan bagaimanapun tidak bersetuju dengan cadangan dibuat Rafizi, bahawa pengguna perlu lebih proaktif dalam tindak balas mereka dengan mengelak restoran dan kedai makanan yang menawarkan makanan serta minuman pada harga yang tidak munasabah.

"Kita tidak boleh mengarahkan pengguna supaya memboikot atau memulau mana-mana peniaga kerana mereka mempunyai persatuan dan boleh berunding elok-elok.

"Peniaga kedai makan dan restoran misalnya, mereka ada persatuan peniaga restoran. Kalau ayam pula ada kesatuan



Menteri Perdagangan Dalam Negeri dan Kos Sara Hidup, Datuk Seri Salahuddin Ayub meninjau harga bawang putih dan ubi kentang import putih yang termasuk dalam harga barangan terkawal sewaktu lawatan sempena pelaksanaan Skim Harga Maksimum Musim Perayaan Tahun Baharu Cina 2023 di ibu negara baru-baru ini.



Kementerian yang berkaitan disaran duduk berbincang mencari penyelesaian terbaik melibatkan isu kenaikan harga dan kekurangan bekalan makanan.

pengeluar dan penternak," kata Hasan.

Disebabkan itu katanya, kerajaan perlu berunding dan mendengar luahan hati mereka,

bukannya membuat keputusan sendiri.

"Kita kena bermuafakat elok-elok. Lepas itu, apabila ada keputusan bersama, ke-

rajaan kena laksanakan terus dan penguatkuasaan mestilah serius. Jangan ada 'kongkali-kung' atau cakap tidak serupa bikin," tegas beliau.

Boikot tidak selesaikan masalah – CAP

SHAH ALAM - Tindakan memboikot peniaga yang dirasakan mengenakan harga terlalu tinggi bukan suatu penyelesaian masalah, sebaliknya kerajaan perlu mengambil tindakan segera bagi memastikan harga barangan tersebut turun.

Presiden Persatuan Pengguna Pulau Pinang (CAP), Mohideen Abdul Kader berkata, kerajaan perlu mencari jalan untuk menyelesaikan masalah berkaitan harga barang dan bukannya membiarkan pengguna untuk membuat pilihan dengan mengelak daripada membeli barangan yang ditawarkan pada harga mahal.

"Sekarang ini, kita tak boleh biarkan pengguna selesaikan masalah tersebut dan sepatutnya kerajaan memainkan peranan.

"Pengguna dalam tempoh ini mempunyai keperluan dan mereka terpaksa membeli barangan tersebut (meskipun ia mahal).

"Kerajaan sepatutnya meneliti masalah yang berlaku bagi memastikan barangan ditawarkan mencukupi dan harganya lebih berpatutan," katanya kepada *Sinar Harian* pada Isnin.

Dalam pada itu, Mohideen mencadangkan langkah untuk menyelesaikan masalah tersebut adalah dengan mengurangkan eksport barangan tempatan ke luar negara selain meningkatkan pengeluaran tanaman sendiri di negara ini.

"Negara kita ada eksport telur, ayam



MOHIDEEN

ke luar negara dan apabila berlakunya masalah maka kerajaan ada ambil tindakan untuk kurangkan eksport.

"Selain itu, sepatutnya tidak perlu lagi mengimport barangan sebaliknya, ambil langkah dengan meningkatkan pengeluaran barangan mentah sendiri di negara ini," ujar Mohideen.

Jelas beliau, kira-kira 60 peratus sayur-sayuran diimport dari luar negara dan ia adalah salah satu punca kenaikan harga.

"Kita import sayur-sayuran dari negara antaranya China, Vietnam dan India seperti ubi kentang, kubis serta lain-lain

lagi. Pada hal cuaca di Malaysia ini sebenarnya sesuai untuk tanaman sedemikian.

"Jadi kerajaan perlu meningkatkan tanaman sayuran-sayuran di negara ini selain tidak lagi terus bergantung dengan import dari negara luar," jelasnya.

Mohideen berkata lagi, salah satu faktor kerajaan juga sukar mengawal harga barangan tersebut adalah kerana ia diimport dari negara luar.

"Harga sayuran keluaran tempatan masih boleh dikawal, namun kalau import dari luar negara, maka kita tidak boleh kawal harga itu.

"Malah peniaga terpaksa menjualnya dengan harga mahal sekali gus membebankan pengguna," katanya.

Senarai Harga Barang Keperluan		Senarai Harga Barang Keperluan		Senarai Harga Barang Keperluan		Senarai Harga Barang Keperluan	
• Ayam	RM7.99	• Telur Gred A	RM13.50	• Gula Pasir	RM2.85	• Cili Merah	RM12.49
• Daging Lembu Tempatan	RM39	• Ikan Kembung	RM15.90	• Bawang Besar Holland	RM3.99	• Kubis Bulat Tempatan	RM4
• Daging Lembu Impor	RM55.80	• Minyak Masak	RM6.90	• Bawang Putih ¹	RM5.38	• Tepung Gandum	RM3.30

¹Harga (RM/kg) Sumber: KPDNHEP